


CONVENIO DE COLABORACIÓN ENTRE A CONSELLERÍA DE POLÍTICA SOCIAL E XUVENTUDE E A COMISIÓN ISLÁMICA DE ESPAÑA SOBRE ASISTENCIA RELIXIOSA ISLÁMICA ÁS PERSOAS MENORES E MOZOS/AS INTERNOS/AS EN CENTROS DE INTERNAMENTO PARA A EXECUCIÓN DE MEDIDAS PRIVATIVAS DE LIBERDADE.

En Santiago de Compostela,

 **MAYO 2023**



REUNIDOS

 Dunha parte Fabiola García Martínez, Conselleira de Política Social e Xuventude, nomeada polo Decreto 60/2022, do 15 de maio, polo que se nomean os titulares das vicepresidencias e consellerías da Xunta de Galicia, actuando en nome e representación da Xunta de Galicia, no uso das facultades que lle veñen atribuídas no artigo 34 da Lei 1/1983, de 22 de febreiro, de normas reguladoras da Xunta e da súa presidencia, e de conformidade co disposto no Decreto 58/2022, do 15 de maio, polo que se establece a estrutura orgánica da Xunta de Galicia, no decreto 73/2022, de 25 de maio, polo que se fixa a estrutura orgánica das vicepresidencias e das consellerías da Xunta de Galicia e segundo o Decreto 124/2022, do 23 de xuño, polo que se establece a estrutura orgánica da Consellería de Política Social e Xuventude.

Doutra parte Mustafá Alhendi Baluch con DNI 3277754P, designado delegado Autonómico da Comisión Islámica de España, elixido en reunión ordinaria da Xunta Directiva desta Comisión, para actuar en nome e representación da entidade ao abeiro do establecido no artigo 13 dos seus estatutos.

Ambas partes, con capacidade xurídica bastante e os representantes con poderes suficientes e axeitados en dereito para obrigar as súas representadas,

EXPOÑEN

  PRIMEIRO.- A Constitución española garante no seu artigo 16 a liberdade ideolóxica, relixiosa e de culto dos individuos e das comunidades e establece que os poderes públicos terán en conta as crenzas relixiosas da sociedade española e manterán as seguintes relacións de cooperación coas confesións que subscribiron Acordos de cooperación co Estado Español.

SEGUNDO.- A colaboración entre a Comisión Islámica de España e o Estado para a atención relixiosa das persoas internadas está expresamente prevista no acordo de cooperación do Estado coa Comisión Islámica de España aprobado por Lei 26/1992, do 10 de novembro, pola que se aproba o Acordo de Cooperación do Estado coa Comisión Islámica de España, que sinala no seu artigo 9 que se garante o exercicio do dereito á asistencia relixiosa dos internados en centros ou establecementos penitenciarios, hospitalarios, asistenciais e outros análogos do sector público,



proporcionada polos imáns e persoas designadas polas Comunidades e debidamente autorizados polos centros ou establecementos públicos correspondentes.

TERCEIRO.- A Lei orgánica 7/1980 de 5 de xullo, de liberdade relixiosa, dispón no seu artigo 2.3 que *"para a aplicación real e efectiva destes dereitos, os poderes públicos adoptarán as medidas necesarias para facilitar a asistencia relixiosa nos establecementos públicos militares, hospitalarios, asistenciais, penitenciarios e outros baixo a súa dependencia, así como a formación relixiosa en centros docentes públicos"*.

CUARTO.- A protección dos nenos aparece recollida no artigo 39.4 da Constitución española, na Convención sobre Dereitos do Neno de Nacións Unidas , de 20 de novembro de 1989, na Lei orgánica 1/1996 de 15 de xaneiro, de protección xurídica do menor, na Lei 3/2011, de 30 de xuño, de apoio á familia e á convivencia de Galicia así como as Regras das Nacións Unidas para a protección de menores privados de liberdade, adoptadas pola Asemblea Xeral na súa resolución 45/113 de 14 de decembro de 1990 (oficina do Alto Comisionado para os Dereitos Humanos).

QUINTO.- A Lei orgánica 5/2000, do 12 de xaneiro, reguladora da responsabilidade penal dos menores, dispón no seu artigo 56.1 que *"todos os menores internados teñen dereito a que se respecte a súa propia personalidade, a súa liberdade ideolóxica e relixiosa e os dereitos e intereses lexítimos non afectados polo contido da condena, especialmente os inherentes á minoría de idade civil cando sexa o caso."*

No artigo 56.2.d) da dita Lei orgánica 5/2000, do 12 de xaneiro, recóllese o dereito dos/as menores internados/as ao exercicio dos dereitos civís, políticos, sociais, relixiosos, económicos e culturais que lles correspondan, salvo cando sexan incompatibles co obxecto da detención ou o cumprimento da condena.

Así mesmo, o artigo 39 do Real Decreto 1774/2004, do 30 de xullo, polo que se aproba o regulamento da Lei orgánica 5/2000, do 12 de xaneiro, reguladora de responsabilidade penal de menores, sinala todos os menores internados terán dereito a dirixirse a unha confesión relixiosa rexistrada, de conformidade co previsto pola lexislación vixente. De acordo co indicado no dito artigo a entidade pública facilitará que os menores poidan respectar a alimentación, os ritos e as festas da súa propia confesión, sempre que sexa compatible cos dereitos fundamentais dos outros internos e non afecte á seguridade do centro, e ao desenvolvemento da vida no centro.

SEXTO.- A Consellería de Política Social e Xuventude, través da Dirección Xeral de Familia, Infancia e Dinamización Demográfica, ten asumidas entre as súas competencias, de acordo co establecido no artigo 14 do Decreto 124/2022, do 23 de xuño, polo que se establece a estrutura orgánica da Consellería de Política Social e Xuventude, a execución das medidas ditadas polos xulgados de menores nos termos establecidos na Lei orgánica 5/2000, do 12 de xaneiro, reguladora da responsabilidade penal dos menores.

SÉTIMO.- A Federación Española de Entidade Relixiosas Islámicas (FEERI) e a Unión de Comunidades Islámicas de España (UCIDE) constituiron o 19 de febreiro de 1992 unha entidade islámica federativa denominada Comisión Islámica de España (CIE) para a adecuada interlocución co Estado Español e, en particular, para a sinatura, seguimento, desenvolvemento e aplicación do Acordo de Cooperación do Estado coa Comisión Islámica de España, asinado o 28 de abril de 1992 e refrendado mediante lei 26/1992, do 10 de novembro.

A Comisión Islámica de España foi inscrita no Rexistro de Entidades Relixiosas do Ministerio de Xustiza, baixo o número 016109.

OITAVO.- Que ambas partes consideran necesario garantir o dereito á asistencia relixiosa dos/as menores fieis da confesión relixiosa musulmá internados/as en centros para o cumprimento de medidas privativas de liberdade.

Por todo elo, co debido respecto á liberdade relixiosa e de conciencia e ao interese superior da persoa menor, tendo en conta a normativa citada, para facer efectivo o dereito á atención relixiosa dos/as menores e mozos/as internos/as nos centros de execución de medidas xudiciais da Comunidade Autónoma de Galicia, as partes subscriben o presente convenio con arreglo ás seguintes:

CLÁUSULAS

PRIMEIRA. *Obxecto*

É obxecto do presente convenio regular as condicións para garantir no ámbito da Comunidade Autónoma de Galicia o dereito á asistencia relixiosa islámica dos/as menores e mozos/as internados/as nos centros de reeducación para o cumprimento de medidas xudiciais de internamento en réxime cerrado de Concepción Arenal (A Coruña), Monteledo (Ourense), Montefiz (Ourense) e Avelino Montero (Pontevedra) en base ao seu dereito á liberdade relixiosa.

SEGUNDA. *Contido da asistencia relixiosa*

A asistencia relixiosa islámica comprenderá as seguintes actividades:

- a) Celebración dos actos de culto nas festividades relixiosas e potestativamente calquera outro día, sen prexuízo das normas de réxime interno e de funcionamento dos centros de reeducación.
- b) Visita da/s persoa/s dirixente/s relixiosa/s ou imás aos/ás menores e mozos/as internados/as e/ou atención pola/s persoa/s dirixente/s relixiosa/s ou imás nun espazo axeitado aos/ás menores que desexen facer algunha consulta ou plantexar dúbidas ou problemas relixiosos.
- c) Instrución e formación relixiosa e asesoramento en cuestións relixiosas e morais.
- d) Aquelas outras actividades pastorais propias da confesión relixiosa musulmá e as relacionadas directamente co desenvolvemento relixioso do/a menor internado/a.

TERCEIRA. *Compromisos da Comisión Islámica de España*

1. A Comisión Islámica de España, designarán imás debidamente acreditados, responsable de impartir asistencia relixiosa islámica. En todo caso a persoa responsable de impartir asistencia relixiosa axustará a súa actividade e o seu exercicio ao establecido na cláusula segunda do presente convenio en colaboración



cos servizos do centro correspondente, para o que deberán contar coa previa autorización da dirección do centro, suxeitándose ao horario e disciplina do centro e aos principios da liberdade relixiosa establecidos na Lei orgánica 7/1980, de 5 de xullo, de liberdade relixiosa.

2. Corresponde á Comisión Islámica de España compensar á/s persoa/s dirixente/s relixiosa/s islámica/s ou aos imás nomeadas para a asistencia relixiosa recollida neste convenio, se o centro queda distante, co gasto establecido para os desprazamentos.

3. Subministrar á Administración toda a información necesaria para o cumprimento das obrigas previstas no Título I da Lei 1/2006, do 18 de xaneiro, de transparencia e bo goberno, coas consecuencias no caso de incumprimento indicadas no artigo 4 da devandita lei.

CUARTA. Cese na prestación da asistencia relixiosa nos centros de reeducación

Os imás encargados da asistencia relixiosa islámica cesarán nas súas actividades nos centros de reeducación para o cumprimento de medidas xudiciais de internamento en réxime cerrado relacionados na cláusula primeira por vontade propia, decisión da autoridade relixiosa da que dependan ou a proposta da Dirección Xeral de Familia, Infancia e Dinamización Demográfica. Nos dous últimos casos se cursarán as comunicacións correspondentes entre a Dirección Xeral de Familia, Infancia e Dinamización Demográfica e a Comisión Islámica de España.

QUINTA. Compromisos da Consellería de Política Social e Xuventude

Corresponde á Consellería de Política Social e Xuventude, a través da Dirección Xeral de Familia, Infancia e Dinamización Demográfica :

a) Facilitar que o/os imán/imáns responsables de impartir asistencia relixiosa poidan asistir a cantos menores e mozos/as de cada centro demanden asistencia relixiosa islámica.

b) Proporcionar ao imán os medios e colaboracións necesarios para o desempeño da súa asistencia relixiosa, provéndoo nos centros de espazos aptos para a atención personalizada e para o resto das actividades recollidas no presente convenio, de conformidade coa estrutura do centro e a súas necesidades.

c) Establecer un réxime de uso dos devanditos espazos para posibilitar o exercicio de dereitos no caso de coexistencia coa práctica doutras confesións relixiosas.

d) Velar para que a dirección dos centros actúe de conformidade co previsto neste convenio.

SEXTA. Condicións económicas

A execución do presente convenio non leva consigo contraprestación económica entre ámbalas dúas partes.

SÉTIMA. Información básica protección de datos persoais

Ambas partes se comprometen ao cumprimento do establecido no Regulamento (UE) 2016/679 do Parlamento Europeo e do Consello do 27 de abril do 2016, relativo á protección das persoas físicas no que respecta ao tratamento de datos persoais e a libre circulación deste datos e polo que se derroga a Directiva 95/46/CE (Regulamento xeral de protección de datos), así como na Lei orgánica 3/2018, de 5 de decembro, de protección de datos persoais e garantía dos dereitos dixitais.

OITAVA. Publicidade

Este convenio será obxecto de publicidade de acordo co previsto no artigo 15 da Lei 1/2016, do 18 de xaneiro. Así mesmo, incluírase no Rexistro Público de Convenios, de conformidade co Decreto 126/2006, de 20 de xullo, polo que se regula o Rexistro de Convenios da Xunta de Galicia.

As partes asinantes do convenio manifestan o seu consentimento para que os datos persoais que constan neste convenio, así como o resto das especificacións contidas no mesmo, poidan ser publicados no Portal de Transparencia e Goberno Aberto.

NOVENA. Comisión de Seguimento

1. De acordo co previsto no artigo 49.f da Lei 40/2015, do 1 de outubro, do réxime xurídico do sector público, créase un órgano mixto de vixilancia e control da execución e aplicación deste convenio e de proposta de resolución de controversias administrativas. A esta comisión mixta de seguimento serán sometidas todas as cuestións derivadas do desenvolvemento deste convenio, e, con carácter previo aquelas que impliquen desconformidade por algunha das partes asinantes.

2. Esta comisión estará composta por dous representantes da Consellería de Política Social e Xuventude, dos cales un deles será nomeado presidente e dous representantes da Comisión Islámica de España, designados por cada unha das partes, así como os seus suplentes.

Actuará como secretario con voz pero sen voto, un/unha funcionario/ a da Dirección Xeral de Familia, Infancia e Dinamización Demográfica, designado pola persoa que asume a presidencia, así coma a persoa que a supla.

A propia comisión acordará o seu calendario de sesións.

3. A dita comisión réxese polo establecido neste convenio e polas previsións que para os órganos colexiados se conteñen na Lei 40/2015 do 1 de outubro, e na Lei 16/2010, de 17 de decembro, de organización e funcionamento da administración xeral e do sector público autonómico de Galicia.

DÉCIMA. Vixencia

O presente convenio de colaboración terá unha duración de catro anos dende a súa sinatura.



En calquera momento antes da finalización do prazo previsto, os asinantes do convenio poderán acordar unanimemente a súa prórroga por un período de ata catro anos adicionais ou a súa extinción.

NOVENA. Modificacións

Cando xurdan circunstancias concretas, debidamente xustificadas, que alteren as condicións establecidas no convenio de colaboración, poderá formalizarse unha modificación ao convenio de colaboración que requirirá acordo unánime das partes, logo dos trámites legais esixidos. Dito acordo que inclúa tal modificación, deberá incluírse como addenda ao convenio.

DÉCIMO PRIMEIRA. Causas de resolución

Serán causas de resolución de este convenio:

- a) O mutuo consentimento.
- b) A súa denuncia por unha das partes, formulada con tres meses de antelación á data na que deba producir efecto.
- c) A celebración dun novo convenio entre as partes que o substitúa.
- d) Calquera outra causa prevista na lexislación vixente.

DÉCIMO SEGUNDA. Consecuencias do incumprimento

O incumprimento de calquera das cláusulas do presente convenio será causa de resolución do mesmo.

A parte incumplidora no terá que indemnizar economicamente á outra parte por incumprimento das obrigas do convenio e pola súa resolución, sen prexuízo da súa responsabilidade fronte a terceiros.

DÉCIMO TERCERA. Natureza xurídica e cuestións litixiosas

O presente convenio de colaboración terá carácter administrativo, e réxese polas cláusulas establecidas nel e, no seu defecto, polo disposto nos artigos 47 a 53 da Lei 40/2015, do 1 de outubro e o establecido na Lei 9/2017, de 8 de novembro, de contratos do sector público pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, de 26 de febreiro de 2014 para aclarar as lagoas e dúbidas que se puidesen presentar.

As cuestións litixiosas xurdidas acerca da interpretación, modificación e resolución serán resoltas pola Consellería de Política Social e Xuventude poñendo os seus



acordos fin á vía administrativa. Contra a dita resolución poderá interpoñerse o recurso potestativo de reposición ante o mesmo órgano que a ditou, segundo o previsto no artigo 124 da Lei 39/2015, do 1 de outubro, se a resolución fose expresa no prazo de un mes. Se o acto non fora expreso, poderá interpor recurso de reposición en calquera momento a partir do día seguinte a aquel en que se produza o acto presunto.

Poderá interpoñerse directamente recurso contencioso- administrativo, no prazo de dous meses contados desde o día seguinte ao da notificación do acto que poña fin á vía administrativa, se fose expreso. Se non o fora, o prazo será de seis meses e contarase, para o solicitante e outros posibles interesados, a partir do día seguinte a aquel en que, de acordo coa súa normativa específica, se produza o acto presunto, de conformidade co disposto na Lei 29/1998, de 13 de xuño, reguladora da xurisdición contencioso – administrativa.

En proba de conformidade con canto antecede, ambas partes asinan o presente convenio de colaboración, por duplicado, no lugar e data expresados.

Pola Consellería de Política Social e Xuventude e Pola Comisión Islámica de España



Fabiola García Martínez

Mustafá Alhendi Baluch

